



basic education

Department:
Basic Education
REPUBLIC OF SOUTH AFRICA

NATIONAL SENIOR CERTIFICATE

LIBANGA 12

SISWATI LULWIMI LWASEKHAYA (HL)

LIPHEPHA LEKUCALA (P1)

LWETI 2013

EMAMAKI: 70

SIKHATSI: 2 ema-awa

Leliphepha linemakhasi la-15.

TICONDZISO KULABAHLOLWAKO

1. Leliphepha lehlukaniwe tigaba LETINTSATFU:

SIGABA A: SIVISISO	(30)
SIGABA B: SIFINYETO	(10)
SIGABA C: LUHLELO NELULWIMI	(30)
2. Phendvula YONKHE imibuto ngeSiswati.
3. Fundza tonkhe ticondziso ngekucopehelela.
4. Cala leso naleso sigaba ekhasini LELISHA.
5. Shiya umugca emkhatsini wetimphendvulo takho.
6. Tinombolo tetimphendvulo atihambisane naleto letisephepheni lemibuto njengobe tinjalo.
7. Caphelisisa sipelingi/lupelomagama nendlela lewakha ngayo imisho.
8. Bhala ngebunono nangesandla lesifundzekako.
9. Siphakamiso sekulawulwa kwesikhatsi:

SIGABA A: Lokungenani emaminitsi la-50
SIGABA B: Lokungenani emaminitsi la-25
SIGABA C: Lokungenani emaminitsi la-45

SIGABA A: SIVISISO**UMBUTO 1****ITHEKSTHI A****1.1 Fundza lethekesthi lelandzelako bese uphendvula imibuto letawulandzela.**

Lamuhla lilanga lekugcina emalangeneni enjabulo lapha eThekwini, lapho kuvakashela khona Ncengiwe Makhanya nesingani sakhe, Jamaica Mphisa, kanye nalabanye bangani babo. Sekusondzele sikhatsi sekutsi babuyele emuva, eSwatini, emakhaya. Bekumnandzi kakhulu kuba lapha njengetitsandzani tishaywa ngumoya welwandle.

Sifiso saJamaica kutsi akhombise kulengabisa yakaMakhanya kutsi uyayinakekela. Phela uyati kutsi tibanjwa ngaletikudlako. Ncengiwe uyakutsandza lokuhle. Utiva asetulu ngaloko lakutfole kulamalanga enjabulo akhohlwe limuva. Kantsi ulikhohlwa nje kwemzuzwana, utsi nawufika umcondvo welimuva, luvalo lumutsi bi. Abuye awucitse lowo mcondvo lomletsela luvalo.

Tivaliwe tikolo njengobe kusigamu semnyaka nje. Ulapha nje ngobe usemalangeneni ekuphumula kwebantfwana besikolo, njengobe naye abenguye umntfwanesikolo, imbali yesigodzi sakubo sakaMaphanga, eSwatini. Batali bakhe bebameluleka kutsi ngeke belusane naye, bona beluse tinkhomo letigcwele sibaya, hhayi umuntfu losekatibona kutsi ukhulile, wabuye wabonwa bantfu nabo labambona kutsi sewukhulile.

Iyaloloma imoti seyiphikelele emnyeleni wemave lamabili. Sebacalile kuwuba umoya wasekhaya ubaphephetsa. Uyatibona tintsaba tangakubo Ncengiwe. Ukhululekile ngobe ekhaya wahamba ngesihle. Batali bakhe bayati kutsi wavakasha kamalume wakhe. Nebasemtini, ikakhulu umnikati wenzaba uyati, futsi nguye lowavuma kutsi avakashe kamalume wakhe ayoshaywa ngumoya angakabuyeli esikolweni.

'Ncengiwe mntfwanaketfu bengicabanga kutsi ngiyokulobola. Ngiyabona kutsi utimisele.'

Wabindza ngekumamatseka alindzele imphendvulo. Endzaweni yekutsi aphenzvule Ncengiwe, wamamatseka wabuka ngaphandle. Naku phela kufanele avume nobe ale. Utawutsi nakala atsi ingcaki ikuphi. Nangabe uyavuma kutawufuneka kutsi kulungiswe lilanga lekutsi Jamaica avakashele ekhaboNcengiwe ayobona batali bakhe njengobe abatani.

'Sicelo sakho ngisetawusicabangisisa, ngitakutjela kutsi kukanjani.'

'Nini manje?'

'Ungangijaki utawuze ungonise.'

'Uyabona-ke, mine angisatfoli kutsi ucondzeni.'

'Ngicondze kutsi asewubambe umoya, mine ngiyati, kutawulunga masinyane.'

Batsite basayichuba indzaba yabo khona lapha emotini, baphazanyiswa ngemaphoyisa labevimbe umgwaco. Tema timoto ngekulandzelana kwato. Atishesha tonkhe ngekulandzelana kwato kwaze kwefika kulena legitjelwe boNcengile nebangani babo. Lamaphoyisa ayamati Jamaica, lamanye awo bafana labekafundza nabo, base bayehlukana ngekwemisebenti. Embikwemoto yabo kwema emaphoyisa aphetse tibhamu. Ngemuva kwayo, eceleni nje bekume lamanye. Loko bekwentiwa kuto tonkhe timoto. Badzilitwa bobane kulemoto kwangeniswainja yasesha.

Ncengiwe wajikisa emehlo wabuka kuyo yonkhe indzawo. Emehlo akhe atitsela kuSimphiwe labegoce tandla akhuluma nalelinye liphoyisa. Lijaha lakaNgcobo belibuke yena mbamba. Ngaleso sikhatsi Jamaica abemgonile. Ncengiwe wakhweshakancane asusa sandla sesitsandvwa sakhe. Jamaica wambamba wamnkhonkhoshela kwatise phela bese kushaya umoya lobandzako. Woma Ncengiwe ngatsi akasaphefumuli.

Simphiwe wasondzela kulabantfu. Emehlo akhe anamatsele kuNcengiwe. Phela linyenti lalamaphoyisa liyamati Ncengiwe, kantsi mabili awo ngiwo latfunywa kuyoba bakhongi baSimphiwe. Wasondzela sayitjeni Ngcobo, wacondza kuNcengiwe labeloku alwa kususa sandla saJamaica.

'Ncengiwe, sawubona.'

Esikhundleni sekutsi avume, wavevetela, buso baphaphatseka. Inhlitiyo yaNcengiwe ibala iyabeka.

'Ncengiwe ngitsite sawubona. Lamuhla ngobe uhamba nesitsandvwa sakho awuvumi?'

Wesuka wakhala. Jamaica wamangala kutsi kwentekani.

Watfukutsela Jamaica.

'Mnaketfu, uyentani intfombi yami?'

'Buka lapha Jamaica, kube angikwati ngabe ngikuhlohla inhlavu manje. Indzaba yinye, tandla tami angifuni tibe nengati yemuntfu longati lutfo. Ngiyati kutsi awati kutsi Ncengiwe ngumfati wami ngimlobolile, ngiyamfundzisa, ngenca yekutsi ngifuna umfati wami angagcilateki. Kimi utsite ufuna kuvakasha. Yini-ke lena lengiyibonako?'

'Mnaketfu, wena loshayelako, ngicela uyimise eceleni. Ngifuna kucondzisisa lendzaba.' Benta njengobe baceliwe. Simphiwe akatsandzanga kwandza ngemagama.

'Ncengiwe, ukhetsa bani kitsi sobabili?'

Taphuphuma tinyembeti tiwela esifubeni.

'Phoyisa, impela uyangati, kodvwa loku lokushoko ngiyakweshwama. INkhosi iyati. Nyalo nje bengisacela yena Ncengiwe kutsi kungaba njani kutsi ngiyomlobola. Kuko konkhe lobekwenteka ngiyacolisa. Naye Ncengiwe ngiyamcolisela. Kube wena ungulomunye umuntfu ngabe uvele wagalela. Ngiyabonga. Bengingati, kutsi ngumfati wemuntfu. Ncengiwe njengamanje nje konkhe kuyaphela kimi nawe. Bewungembisa lidliza lami. Sala kahle.'

Bamshiya lapho.

Akatsandzanga kwandza ngemagama Simphiwe aloku agwebana naNcengiwe. Njengobe besebacedzile umsebenti wabo welusuku wamtsatsa wahamba naye. Endleleni Ncengiwe abeloku abibitseka. Netinkhomo lebetisekhaya kubo esibayeni ngatsi uyativa tibhonsa, nemali yesikolo lebeyikhishwa nguSimphiwe ngatsi uyayibona iphephuka emoyeni embikwakhe.


[Umshiyangculu emakhasi 84-85]

Phendvula yonkhe imibuto ngekubhekisa tonkhe timphendvulo takho kuletheksthi lengenhla.

- 1.1.1 Yini lebeyiphazamisa Ncengiwe ekujabuleni kwakhe eThekwini? (1)
- 1.1.2 Khokha umusho lochaza kutsi Ncengiwe abemuhle kakhulu. (1)
- 1.1.3 Kuko konkhe lokumnadzi betijatjuliswa yini letitsandzani eThekwini? (1)
- 1.1.4 Ngubaphi labantfu lekutsiwa bambona Ncengiwe kutsi ukhulile? (1)
- 1.1.5 Nguwaphi lamaholide lahamba ngawo Ncengiwe kuya eThekwini? Khetsa imphendvulo: (1)
 - A Emaholide eGudi/ePhasika
 - B Asebusika
 - C Entfwasahlobo
 - D Akhisimusi
- 1.1.6 Timhlupha ngani Ncengiwe letinkhomo takubo? (1)
- 1.1.7 Yini leyabangela batali baNcengiwe bakhululeke nakatsi uyovakasha? (1)
- 1.1.8 Bhala inchazelo yeligama lelidvwetjelwe kulomusho lolandzelako. 'Impela loku ngiyakweshwama.' (1)
- 1.1.9 Phawula ngaleligama, '**ingabisa**', lelisetjentiswe kuletheksthi lengenhla. (2)
- 1.1.10 Ngumncele wawaphi emave lamabili lemoto yaboJamaica lebeseyiphikelele kuwo? (2)
- 1.1.11 Emakhuba abelingene balimi kulemoto yaboJamaica. Chaza lesaga ubhekise kuletheksthi lengenhla. (2)
- 1.1.12 Usho kutsini Jamaica ngalamavi lawacondzise kuNcengiwe? 'Bewungembisa lidliza lami.' (2)
- 1.1.13 Kube wena bewunguSimphiwe bewutamentani Ncengiwe nanifika ekhaya ngalesento sakhe? (2)
- 1.1.14 Ngabe lamavi aSimphiwe aliciniso nobe angumbono? Sekela imphendvulo yakho. 'Ngiyamfundzisa ngobe ngifuna angagcilateki.' (2)

1.2 Fundza lesibonwa lesingentasi bese uphendvula imibuto letawulandzela.

ITHEKSTHI B



[<http://www.inherit the earth.net>]

- 1.2.1 Ucabanga kutsi tindzaba tini letikhulunywa lapha kulesibonwa lesingenhla? (1)
- 1.2.2 Ucabanga kutsi batewentani labantfu labakulesibonwa lapha kulenzawo labakuyo? (1)
- 1.2.3 Yini lebangela kutsi labantfu labakulesibonwa bahambe bakhumule ticatfulo? (1)

- 1.2.4 Bhala ingoti yinye lekuvame kukhulunywa ngayo ngalendzawo labakuyo. (1)
- 1.2.5 Tecwayiso tini longatinika labantfu lababili njengemuntfu lomusha kute imphilo yabo ingahlaselwa tifo kalula? Bhala tibe timbili. (2)
- 1.2.6 Ucabanga kutsi simo selitulu besinjani nakutsatfwa lesitfombe lesikuletheksthi lengenhla? Sekela imphendvulo yakho ngeliphuzu linye. (2)
- 1.2.7 Itheksthi B inabudlelwano buni netheksthi A? (2)

SAMBA SIGABA A: 30

SIGABA B: SIFINYETO**UMBUTO 2**

Fundza lethekesthi lelandzelako bese uyayifinyeta ngewakho emagama langabi ngetulu kwala-70, uvete **emaphuzu lasikhombisa lamcoka laphatselene naloko lokukhatsata Sipiwe aze aye kumeluleki.**

TICONDZISO

1. Finyeta ngewakho emagama ukhokhe emaphuzu lamcoka lasikhombisa.
2. Sifinyeto sakho asibe ngendlela yetindzima (emapharagrafu) NOBE indlela yemaphuzu.
3. Emaphuzu akho akabe imisho legcwele.
4. Nangabe sifinyeto sakho singendlela yemaphuzu, nika emaphuzu akho tinombolo (1–7), kodvwa nangabe singetindzima, dvwebela lamaphuzu lasikhombisa.
5. Khombisa linani lemagama lowasebentisile ekugcineni kwemphendvulo yakho.

SIPHIWE UCOCA NEMELULEKI NGEMPHILO NEKUTIPHATSA KWAKHE

'Ngifuna sicoce ngekukhululeka, ungesabi kungitjela nanobe ngayini kanye nekungibuta nobe ngayini. Nami ngitakutjela konkhe lengibona kutsi kubalulekile kutsi ngikutjele kona.' Emavi emeluleki lawo.

'Ngitawucala ngive ngawe sisi kutsi yini lekwente wafuna kutewukhuluma nami njengemeluleki.'

Wayilandza Sipiwe indzaba alalele ngekutimisela umeluleki. Wayilandza yonkhe yasemhlangeni lapho batsatfwa khona ngemasotja ayobahlukumeta ngobe atawubanika imali. Loko kwalimata nembeza wakhe lesoloko alwa naye angati kutsi lentfo utayisusa njani engcondvweni yakhe.

Akamange ayishiye naleyo yekutsatfwa ngemajaha ayobacaphata ehhotela ngesikhatsi sesikolo. Loko kwamenta watenyanya mbamba Sipiwe. Wabona kutsi buntfombi bakhe bacekelwa phansi. Abengati kutsi angabubuyisa ngayiphi indlela. Wayilandza yonkhe naleyo yekugagadlelwa nguMusa. Kepha-ke ucedze lena yaMusa sekacala kukhala kwatise phela kutsi ngiyo kanye lebeyimletsela luvalo nekutfutfumela.

Uyichazile naleyo yekutsatsa luhlolo lwekukhulelwa lekatawutfola umphumela walo nakaphuma lapha. Inkhulumo yakhe uyicedze ngemagama labuhlungu.

'Manje yonkhe lentfo leyenteke lapha kimi ingishiye nebuhlungu lobukhulu. Ngifise kwati kutsi ngimephi nje nyalo emphilweni.'

'Ngiyabonga Sipiwe kungichazela kahle yonkhe indzaba. Ngiyakholwa kutsi konkhe longichazele kona kungemaciniso sibili. Ngifuna kukutjela kutsi ngikukhandza ungumntfwana lonebuntfu lobuhle kakhulu. Kuyenteka Sipiwe kutsi umuntfu akhubeke endleleni awe abuye avuke achubeke neluhambo lwakhe. Lokubi kuwa ubhabhalale ungabe usavuka. Nanome bewungavuka sewunemanceba kepha nawutawukhona kuhamba, uncono kunaloyo lotawufela lapho awele khona.

'Wena-ke ulichawe lelilwe latfola imihuzuko lapha nalapha. Luhlole lwekukhulelwa nobe lungatsi ukhulelwe, loko akusho kuphela kwematsemba kuwe. Kanjalo neluhlolo lwengculaza nobe lungaveta kutsi unalo leligciwane akusho kutsi sewufanelwe kufa. Imphilo lenelwati ngiyo imphilo sibili. Uyakuva loko Sphiwe?'

'Yebo Nkhosi ngiyeva. Kepha bengifisa kutsi kungabi khona lokwenteka kimi Nkhosi yami.'

'Kunjalo Canco. Lokubalulekile kutsi nakukhona lokwentekile wena kufanele uhlangabetane nako kanjani. Nyalo singasatihlupha ngekutsi kwentekeni kwekutsi nekwekutsi kepha sesibuka lekumele kwenteke nasekunjena. Ase ngibute wena Phiwe, ungenta njani nakutfolakala kutsi utetfwele?'

'Eyi ... Angati, bangangibulala ekhaya ... Angati vele ...'

'Ucinisile lapho kutsi kawati, kepha ngeke bakubulale ekhaya. Liciniso kutsi bangeva buhlungu kuva kutsi uphazamisekile esikolweni kepha bangakwemukela kuloko ngobe nobe kubuhlungu solo ungumntfwana wabo. Intfo lebalulekile kuhlala phasi nebatali bakho nikhulumisane nangabe utetfwele.

Ake sitsi umphumela wekuhlola ingculazi uphuma utsi unalo leligciwane ungenta njani?'

'Ngingatinikela eNkhosini ngihlale ngilikhola leliphelele ngobe seningafa nobe kunini.'

'Nakwenteka luhlolo lutsi vele kunjalo kufuneka uphile ngekutinakekela wentele kutsi ungasheshi ubanjwe tifo letitakubeka phasi. Lwati ngesimo sakho ngengculazi lutakusita kutsi utivikele ubuye uvikele labanye longahle ubatselele nangabe unalo. Akusho kutsi ungatfolakala unalo sewutawufa masinyane. Cha akunjalo.'

[Bungani Bebangani emakhasi 116–118]

SAMBA SIGABA B: 10

SIGABA C: LUHLELO NELULWIMI**UMBUTO 3**

Fundza lethekesthi lelandzelako bese uphendvula imibuto letawulandzela.

LANDWANDWE, BHIKAWOZI YEMHLABA!

Liphunga lelimnandzi, lelishaya ngekhatshi kufike indlala! Nguwe wedvwa Ndwandwe lonesiphiwo sekubhaka emakhekhe lavutisa ematse! **1**

Sikhutsali! Awufuni kubona fulawa embikwakho! Uyibhikawozi mbamba! **2**

Khetsani LaNdwandwe kubo bonkhe bafati lababhakako!

Titsako lotisebentisak o telukhetselo tidvonsa batsengi! **3**

Lodla emakhekhe labhakwe nguwe Ndwandwe akaphindzi alambe, kumbe ahlaselwe tifo. **4**

[<http://www.kingfeatures.com>]

- 3.1 Bhala mcondvophika weligama lelidvwetjelwe lelisetjentiswe kulesikhangisi lesingenhla.

'Livila alivami kuphumelela emphilweni.'

(1)

- 3.2 Khokha umusho lonesinongo 'sekumuntfutisa' kulesikhangisi uwubhale phasi.

(1)

- 3.3 Nika inchazelo yeligama lethehkhiniki lelidvwetjwelwe kulomusho lolandzelako.
'Uyibhikawozi mbamba!' (1)
- 3.4 Yini lebangela buso lobumamatsekako kulona lomsikati kulesikhangisi? (1)
- 3.5 Tisetjentiselwani letinhlavu letinkhulu kulomusho lolandzelako lotsetfwe kulesikhangisi?
LANDWANDWE, BHIKAWOZI YEMHLABA! (1)
- 3.6 Bakabani labananatela batsi Ndwandwe? (1)
- 3.7 Kunemusho lotsatsa luhlangotsi kulesikhangisi. Wubhale phasi bese udvwebela leligama leliwenta utsatse luhlangotsi. (2)
- 3.8 Faka inselele kulenkhumo lebhalwe efreyimini 4 kulesikhangisi. (2)
- [10]**

UMBUTO 4

Fundza lekhathuni lelandzelako bese uphendvula imibuto letawulandzela.

Ummango utfukutsele ngendzaba yekudlwengulelwa emakhosikati nebantfwana bawo. Njengol ubabona nje bavumelene ngekutsi batigwebele bona letigilamkhuba. 1

Lomshikashika ufuna emadvodza ngobe ngiwo lakwati kulwa njengobe bafati bancelencele. Kubhubhisa konkhe lesitakutfo lapho ngulona khambi lelitasikhulula. Sesitawuhamba singesabi lutfo. 4

Lamuhla batawukhomba umuti lonetjwala, letingcalamba leti! Sitawutsi singabatfo, sibagigele ngemaketane bese siyatentela. 5

SIBANCOBI!
ASINAWHLULWA
BAFANYANA LABANUKA
LUBISI SINGEMADVODZA!

"Madvodza, lapha akufuneki bantfu labangemagwala. Lemphi lesibukene nayo imatima." 2



Lokwetinswelaboya bekutsi kwati kakhulu kantsi alikho licili lelatikhotsa emhlane. 6

Ngiyetsemba nonkhe nitiphetse tikhali tenu. Akwetsembeki lokwetigebengu, kungenteka kuhlomile. 3

[<http://www.cartoons.com>]

- 4.1 Kulomusho lolandzelako lotsetfwe kulekhathuni lengenhla bhala ligama lelingumcondvofana walelidvwetjelwe.
'Sitawutsi singabafola, sibagigele ngemaketane bese siyatentela.' (1)
- 4.2 Esikhundleni seligama lelidvwetjelwe bhala ligama lelinenchazelo yalo lensha.
'Ngiyetsemba nitiphetse tikhali tenu.' (1)
- 4.3 Tsatsa ligama lelidvwetjelwe kulomusho lolandzelako wakhe ngalo umusho lotawuveta inchazelo leyehlukile kulena leshiwo kulekhathuni.
'Kubhubhisa konkhe ngulona khambi lelitasikhulula.' (1)
- 4.4 Khokha umusho kulekhathuni lengenhla loneligama lelingema esikhundleni salelibintana lelilandzelako bese uyalidvwebela.
'Umuntfu lotatiko longenandzaba nalabanye bantfu.' (1)
- 4.5 Indlela labantfu labakulekhathuni lababukeka ngayo inabudlelwano buni nalokushiwo kulekhathuni? (1)
- 4.6 Lesisho lesidvwetjelwe kulomusho lolandzelako sishoni?
'Lamuhla batawukhomba umuti lonetjwala.'
Khetsa inchazelo yalesisho kuletinchazelo letilandzelako:
A Batawulayela bantfu lapho kutfolakala khona tjwala.
B Batawulayela emaphoyisa lapho kutsengiswa khona tjwala.
C Batawubenta lokubi/ batawubalimata.
D Tonkhe timphendvulo letingenhla temukelekile. (1)
- 4.7 Faka inselele kulenkhumo lelandzelako lesefreyimini 4 kulekhathuni lengenhla.
'Lomshikashika ufuna emadvodza ngobe ngiwo lakwati kulwa njengobe bafati bancelencele.' (2)
- 4.8 Khokha saga lesisetjentiswe kulekhathuni lengenhla usisebentise emshweni lotawuveta kutsi uyayati inshokutsi yaso. (2)

[10]

UMBUTO 5

Fundza lethekesthi lelandzelako lenemaphutsa elulwimi bese uphendvula imibuto letawulandzela.

Kulapho kuphambana khona tindlela tasemabhange lamakhulu i-ABSA neFNB. Kunesicuku sebafeanyana labalele batse nja elangeni batsamele sicele. Kusemini, bacambalele, ngulowo ucamele engcozeni. Eceleni kwemshini wekukhokha imali kume umfanyana, ufumbetse sishuntjane salokutsi. Limakhata linjalo nje. Phasi eceleni kwakhe kunelibhodlela lelibisi. Kwakhe kucela lokudliwako kulabatewukhokha imali emabhange. Angaketeleli, emukelise lidazini lemabhanisi ngulomunye lotengcelako. Labanye bamsole ngalesento ngobe baticabangela intselantsengo leseenyukile. Lenye inkhosatana ibekhute. Ivakale seyibhavumula itsi, 'Asilweni nebuphuya bantfu bakitsi. Imphilo yetfu ilivili. Kusa kusa!' Livi lakhe livuse bafanyana labalele. Bavuke, batitsintse babambe lejubako lecondze kulenye indzawo.

Kuyadzabukisa kakhulu lokwenteka esiveni sakitsi. Nobe kunjalo, kuyawubuye kulunge, kuphela nje natingabuya emasisweni, inhlonipho nekuvelana kubuye esiveni sakitsi, hhayi loku lesesikubona kulamalanga.

Sive sakitsi siyecwayiswa kutsi sibocaphela njalo nasiyewukhokha imali emishinini, kumele uhambe nemuntfu ngobe akusaphephanga kulamalanga. Kudzingeka kutsi sivule emehlo sicalate nasiyewukhokha imali. Ngisho yona lemishini yemali ibhonywa imihla nemalanga. [Icanjiwe]

- 5.1 Kulethekesthi lengenhla khokha umusho lonelibitombici bese ubhala lelibitombici. (1)
- 5.2 Khetsa umusho lonelubhalomagama lolwemukelekile eSiswatini kulena lelandzelako:
- A Kulapho kuphambana khona tindlela tasemabhange iABSA neFNB.
 B Kulapho kuphambana khona tindlela tasemabhange iABSA ne-FNB.
 C Kulapho kuphambana khona tindlela tasemabhange i-ABSA neFNB.
 D Kulapho kuphambana khona tindlela tasemabhange i-ABSA ne-FNB. (1)
- 5.3 Lungisa liphutsa lelulwimi kulomusho lolandzelako:
- 'Phansi eceleni kwakhe kunelibhodlela lelibisi.' (1)
- 5.4 Kulethekesthi lengenhla kunemusho lonemphambosi lengakhiciti leveta umcondvo wekweyamana (kutsintsana), wukhokhe bese udvwebela lesento lesikuleyo mphambosi. (1)
- 5.5 Khokha umusho locuketse umshwana lokhontile lomele sizatfu kulethekesthi lengenhla. (1)
- 5.6 Cala lomusho lolandzelako ngekutsi, Inkhosatana yatsi ...
- 'Imphilo yetfu ilivili.' (1)

5.7 Sebentisa sento **'hamba'** ekwakheni imisho lenaletindlela tesento letilandzelako:

5.7.1 Indlela yesimo (1)

5.7.2 Indlela leyamile (1)

5.8 Tsatsa sentakutsi lesikuletheksthi lengenhla usisebentise emshweni lotakhele wona.

(2)
[10]

SAMBA SIGABA C: 30
SAMBA SAKO KONKHE: 70